

## **MAISA RADONDA – CUN PRELECZIUN DA LILLY BARDILL**

Als 29 settember ha gnü lö la 9. maisa radonda a Tschier, S-chars 30 personas han tut part a l'arrandschamaint. Davo il rapport annual 2021/22 ha Lilly Bardill prelet our da seis crimi "Mord in der Altersresidenz". Implü ha ella raquintà duos istorgias d'üna seniore a chasa e d'ün senior ün pa dement chi ha fat üna viadi ad Arosa in lingua rumantscha. Lilly Bardill s'ha occupada già bod cul gnir vegl. Ella nun ha mai tgnü temma dal gnir vegl. Per Lilly es il gnir vegl üna ledscha da la natüra. Ella ha scrit divers cudeschs sur da quist tema, sco "Wie kann ich fliegen ohne Flügel", «Alter schützt vor Freude nicht», «Wenn die Wasser strudeln in Venezia» Il crimi «Mord in der Altersresidenz» dà ün'ögliada interessanta davu ils mürs d'üna instituziun cha bliers da nus cugnuoschan be dal far visitas. Il cudesch es daplü sco be ün crimi. El es ün pledoyer per spranza e charità chi s'orientescha als bsögns da la glied attempada e na be als concepts da chüra. Grazia fich Lilly per l'excitant crimi e l'interessanta prelecziun.

Othmar Lässer rapporta sur da la retschercha dal bsögn dad abitar cun chüra in Val Müstair. A la maisa radonda 2021 nun es gnüda tratt'üna decisiun clera. Il giavüsch da be pacas personas, chi voulan gnir vegls cun autodeterminaziun a chasa, es massa pac marcant, per lair fabricar sü ün "abitar cun chüra". La gruppa da focus nu vezza üna necessità per ün servezzan da chüra implü sco alternativa per l'abitar cun chüra. La spitex, la clinica da di e IDEM cumpletan il star a chasa fich bain.

La società "insembel" es gnüda fundada als 6 avrigl 2022 per l'Engiadin'Ota. Il böt es da güdar a voluntaris da chattar ün ingaschamaint tenor lur abiltà e da sustgnair a societats ed otras organisaziuns da chattar ils agüdents adattats. Cun üna plattafuorma da coordinaziun per lavuors voluntarias es gnü s-chaffi il tool necessari. Id es pussibel cha la Val Müstair po gnir integrada in quist'società.

Avant la posa e sco finischun da l'occurenza sun gnüdas chantadas chanzuns popularas cun Giancarlo e Chasper. Grazia fich per il bel püschel chanzuns. Ün stogn grazia fich eir a las duonnas da la società da duonnas Müstair per la decoraziun, tuorta e caffè.

